

大毘盧遮那成佛神變加持經 卷第六

大唐 天竺三藏善無畏 共沙門一行 譯

說菩提性品第二十四

譬如十方虛空相 常遍一切無所依
如是真言救世者 於一切法無所依
又如空中諸色像 雖可現見無依處
真言救世者亦然 非彼諸法所依處
世間成立虛空量 遠離去來現在世
若見真言救世者 亦復出過三世法

唯住於名趣 遠離作者等
虛空眾假名 導師所宣說
名字無所依 亦復如虛空
真言自在然 現見離言說
非火水風等 非地非日光
非月等眾曜 非晝亦非夜
非生非老病 非死非損傷
非剎那時分 亦非年歲等
亦非有成壞 劫數不可得
非淨染受生 或果亦不生
若無如是等 種種世分別
於彼常勤修 求一切智句

大盧毗遮那成佛神變加持經義釋演密鈔卷第十

燕京圓福寺崇祿大夫檢校太保行崇
祿卿總秘大師賜紫沙門 覺苑 撰

【經】

「唯住於名趣」至「現見離言說」者。此中初一偈，出虛空之體，但是名等，為順世間，趣假施設故。其虛空體，不可得也。次之一偈釋成假名，同於空故。謂世間名字，隨應假立，求其實義，即同虛空，俱不可得。真言亦爾，體離言說，畢竟無得，但為諸佛以方便力，令諸眾生普入佛慧，從空立假，從假立空，眾生依此，而生實見。如是實見，即是菩提之性，離此實見外別有菩提，無有是處。

【疏】

前偈云空，但有名等者，前偈者，初偈中第三句也，後偈者，次偈第二句也。

【疏】

離於因緣等者，如是阿字真言之體，無明無暗，無晝夜差別之異，即是離因緣，離於如是因緣，即是實相常住，如是實相常住，即是大日如來之體，如是大日之體，即是菩提之性，如是菩提之性，云何不能離於生死耶？是能離於下文生死等也。

【經文資訊】卅新續藏第23冊 No. 0439 大日經義釋演密
鈔

大毘盧遮那成佛神變加持經 卷第六

大唐 天竺三藏善無畏 共沙門一行 譯

百字成就持誦品第二十二

爾時世尊告執金剛祕密主言：

諦聽，祕密主！

真言救世者，身身無有異分。意從意生，令善淨除，普皆有光。彼處流出，相應而起，遍諸支分。彼愚夫類，常所不知，不達此道。乃至身所生分，無量種故。

如是真言救世者，分說亦無量。

譬如吉祥真陀摩尼，隨諸樂欲，而作饒益。

如是世間照世者身，一切義利，無所不成。

祕密主！云何無分別法界，一切作業隨轉。

祕密主！亦如虛空界，非眾生、非壽者，非摩奴闍、非摩納婆，非作者、非吠陀，非能執、非所執。離一切分別，及無分別。而彼無盡眾生界，一切去來，諸有所作，不生疑心。如是無分別一切智智，等同虛空。於一切眾生內外而轉。

爾時世尊又復宣說淨除無盡眾生界句，流出三昧句、不思議句、轉他門句。

若本無所有 隨順世間生
云何了知空 生此瑜伽者
若自性如是 覺名不可得
當等空心生 所謂菩提心
應發起慈悲 隨順諸世間
住於唯想行 是即名諸佛
當知想造立 觀此為空空
如下數法轉 增一而分異
勤勇空亦然 增長隨次第
即此阿字等 自然智加持

……

祕密主！觀此空中，流散假立。阿字之所加持，成就三
味道。……

【經文資訊】大正藏第18冊 No. 0848 大毘盧遮那成佛神
變加持經

摩訶般若波羅蜜經 卷第五

後秦龜茲國三藏鳩摩羅什譯

◎摩訶般若波羅蜜經廣乘品第十九（丹本名為四念處品）

「復次，須菩提！

菩薩摩訶薩摩訶衍，所謂字等語等諸字入門。

何等為字等語等諸字入門？

阿字門，一切法初不生故。

羅字門，一切法離垢故。

波字門，一切法第一義故。

遮字門，一切法終不可得故，諸法不終不生故。

那字門，諸法離名，性相不得不失故。

邏字門，諸法度世間故，亦愛支因緣滅故。

陀字門，諸法善心生故，亦施相故。

婆字門，諸法婆字離故。

茶字門，諸法茶字淨故。

沙字門，諸法六自在王性清淨故。

和字門，入諸法語言道斷故。

多字門，入諸法如相不動故。

夜字門，入諸法如實不生故。

陀字門，入諸法折伏不可得故。
迦字門，入諸法作者不可得故。
娑字門，入諸法時不可得故，諸法時來轉故。
磨字門，入諸法我所不可得故。
伽字門，入諸法去者不可得故。
他字門，入諸法處不可得故。
闍字門，入諸法生不可得故。
𪔐字門，入諸法𪔐字不可得故。
馱字門，入諸法性不可得故。
賒字門，入諸法定不可得故。
𪔐字門，入諸法虛空不可得故。
叉字門，入諸法盡不可得故。
哆字門，入諸法有不可得故。
若字門，入諸法智不可得故。
陀字門，入諸法陀字不可得故。
婆字門，入諸法破壞不可得故。
車字門，入諸法欲不可得故，如影五陰亦不可得故。
摩字門，入諸法摩字不可得故。
火字門，入諸法喚不可得故。
嗟字門，入諸法嗟字不可得故。
伽字門，入諸法厚不可得故。
他字門，入諸法處不可得故。
拏字門，入諸法不來不去不立不坐不臥故。

頗字門，入諸法遍不可得故。

歌字門，入諸法聚不可得故。

醯字門，入諸法醯字不可得故。

遮字門，入諸法行不可得故。

咤字門，入諸法偃不可得故。

茶字門，入諸法邊竟處故不終不生，過茶無字可說。

何以故？更無字故。

諸字無礙，無名亦滅，不可說不可示、不可見不可書。

須菩提！當知一切諸法如虛空。

須菩提！是名陀羅尼門。

所謂阿字義，若菩薩摩訶薩，是諸字門印阿字印，若聞若受若誦若讀、若持若為他說，如是知當得二十功德。

何等二十？

得強識念，得慚愧，得堅固心，得經旨趣，得智慧，得樂說無礙，易得諸餘陀羅尼門，得無疑悔心，得聞善不喜聞惡不怒，得不高不下住心無增無減，得善巧知眾生語，得巧分別五陰、十二入、十八界、十二因緣、四緣、四諦，得巧分別眾生諸根利鈍，得巧知他心，得巧分別日月歲節，得巧分別天耳通，得巧分別宿命通，得巧分別生死通，得能巧說是處非處，得巧知往來坐起等身威儀。

須菩提！是陀羅尼門字門、阿字門等，是名菩薩摩訶薩摩訶衍。」

【經文資訊】大正藏第 08 冊 No. 0223 摩訶般若波羅蜜經

大般若波羅蜜多經

卷第四百九十

三藏法師玄奘奉 詔譯

第三分善現品第三之九

「復次，善現！諸菩薩摩訶薩大乘相者，謂四無礙解。何等為四？一者、義無礙解。二者、法無礙解。三者、詞無礙解。四者、辯無礙解。善現！如是四無礙解，以無所得而為方便，當知是為菩薩摩訶薩行深般若波羅蜜多時大乘之相。

「復次，善現！諸菩薩摩訶薩大乘相者，謂十八佛不共法。何等十八？謂諸如來、應、正等覺，始從證得無上正等菩提夜，乃至入無餘依涅槃夜，於其中間，常無誤失，無卒暴音，無忘失念，無種種想，無不定心，無不擇捨，志欲無退，精進無退，念無退，定無退，慧無退，解脫智見無退，一切身業智為前導隨智而轉，一切語業智為前導隨智而轉，一切意業智為前導隨智而轉，於過去世所起智見無著無礙，於未來世所起智見無著無礙，於現在世所起智見無著無礙。如是十八佛不共法，無不皆以無所得為方便，當知是為諸菩薩摩訶薩行深般若波羅蜜多時大乘之相。

「復次，善現！

諸菩薩摩訶薩大乘相者，謂諸文字陀羅尼門。

何等文字陀羅尼門？

謂字平等性、語平等性入諸字門。

云何字平等性、語平等性入諸字門？

「善現當知！

便，

若菩薩摩訶薩行深般若波羅蜜多時，以無所得而為方

入哀字門，悟一切法本不生故；

入洛字門，悟一切法離塵垢故；

入跛字門，悟一切法勝義教故；

入者字門，悟一切法遠離死生，若死若生皆無所得為
方便故；

入娜字門，悟一切法遠離名相，若名若相皆無所得為
方便故；

入礞字門，悟一切法出世間故，愛染因緣不現前故；

入柁字門，悟一切法調伏寂靜真如平等無分別故；

入婆字門，悟一切法離縛解故；

入荼字門，悟一切法離熱矯穢得清淨故；

入沙字門，悟一切法無罣礙故；

入縛字門，悟一切法言音道斷故；

入頹字門，悟一切法真如不動故；

入也字門，悟一切法如實不生故；

入瑟吒字門，悟一切法制伏任持相不可得故；

入迦字門，悟一切法作者不可得故；

入娑字門，悟一切法時平等性不可得故；

入磨字門，悟一切法我所執性不可得故；

入伽字門，悟一切法行動取性不可得故；

入他字門，悟一切法所依處性不可得故；

入闍字門，悟一切法能、所生起不可得故；

入濕縛字門，悟一切法安隱之性不可得故；

入達字門，悟一切法能持界性不可得故；

入捨字門，悟一切法奢摩他性不可得故；

入佉字門，悟一切法如太虛空，平等之性不可得故；

入羼字門，悟一切法窮盡之性不可得故；

入薩頹字門，悟一切法任持之性不可得故；

入若字門，悟一切法能所知性不可得故；

入[刺√刺]他字門，悟一切法執著義性不可得故；

入呵字門，悟一切法能為因性不可得故；

入薄字門，悟一切法可破壞性不可得故；

入綽字門，悟一切法欲樂覆性不可得故；

入颯磨字門，悟一切法可憶念性不可得故；

入嗑縛字門，悟一切法可呼召性不可得故；

入蹉字門，悟一切法離勇健故；

入鍵字門，悟一切法厚平等性不可得故；

入捫字門，悟一切法積集之性不可得故；

入拏字門，悟一切法離誼雜故；

入頗字門，悟一切法無果報故；

入塞迦字門，悟一切法離蘊性故；

入逸娑字門，悟一切法衰老性相不可得故；

入酌字門，悟一切法無足迹故；

入吒字門，悟一切法相驅迫性不可得故；

入擇字門，悟一切法究竟處所不可得故。

「善現當知！此擇字門是能悟入法空邊際，除此諸字表諸法空，更不可得。所以者何？此諸字義，不可宣說，不可顯示，不可書持，不可執取，不可觀察，離諸相故。善現當知！譬如虛空，是一切物所歸趣處。此諸字門亦復如是，諸法空義皆入此門方得顯了。」

「善現當知！入此裏字等，名入諸字門。諸菩薩摩訶薩若於如是入諸字門得善巧智，是菩薩摩訶薩於諸言音所詮、所表皆無罣礙，於一切法平等空性盡能證持，於眾言音咸得善巧。若菩薩摩訶薩能聽如是入諸字門印相、印句，聞已受持、讀誦、通利、為他解說無所執著，不徇名譽、利養恭敬，由此因緣得三十種功德勝利。何等三十？謂得強憶念，得勝慚愧，得堅固力，得法旨趣，得增上覺，得殊勝慧，得無礙辯，得總持門，得無疑惑，得違順語不生愛恚，得無高下平等而住，得於有情言音善巧，得

蘊善巧，得界善巧，得處善巧，得諦善巧，得緣起善巧，得因善巧，得緣善巧，得法善巧，得根勝劣智善巧，得他心智善巧，得神境智善巧，得天耳智善巧，得宿住隨念智善巧，得死生智善巧，得漏盡智善巧，得處非處智善巧，得往來智善巧，得威儀路智善巧，是為三十功德勝利。

「善現當知！若菩薩摩訶薩行深般若波羅蜜多時，以無所得而為方便，得如是文字陀羅尼門，當知是為菩薩摩訶薩行深般若波羅蜜多時大乘之相。

【經文資訊】大正藏第 07 冊 No. 0220 大般若波羅蜜多經
(第 401 卷-第 600 卷)

大智度論釋四念處品第十九(卷四十八)

龍樹菩薩造

後秦龜茲國三藏鳩摩羅什譯

【經】

「復次，須菩提！菩薩摩訶薩摩訶衍，所謂佛十力。何等十？佛如實知一切法是處不是處相，一力也。如實知他眾生過去、未來、現在諸業諸受法，知造業處，知因緣、知報，二力也。如實知諸禪、解脫、三昧、定垢淨分別相，三力也。如實知他眾生諸根上下相，四力也。如實知他眾生種種欲解，五力也。如實知世間種種無數性，六力也。如實知一切至處道，七力也。知種種宿命，有相、有因緣，一世、二世乃至百千世，劫初劫盡，我在彼眾生中：如是姓，如是名，如是飲食、苦樂、壽命長短；彼中死、是間生，是間死、還生是間，此間生姓名、飲食、苦樂、壽命長短亦如是，八力也。佛天眼淨，過諸天眼，見眾生死時生時、端正醜陋、若大若小、若墮惡道若墮善道；如是業因緣受報：是諸眾生惡身業成就、惡口業成就、惡意業成就、謗毀聖人，受邪見業因緣故，身壞死時入惡道，生地獄中；是諸眾生善身業成就，善口業成就，善意業成就，不謗毀聖人，受正見業因緣故，身就壞時入善道，生天上，九力也。佛如實知諸漏盡故，無漏心解

脫，無漏慧解脫；現在法中自證知入是法，所謂我生已盡，梵行已作，從今世不復見後世，十力也。須菩提！是名菩薩摩訶薩摩訶衍，以不可得故。

「復次，須菩提！菩薩摩訶薩摩訶衍，所謂四無所畏。何等四？

「佛作誠言：『我是一切正智人。』若有沙門、婆羅門，若天、若魔、若梵、若復餘眾，如實難言：『是法不知。』乃至不見是微畏相。以是故，我得安隱，得無所畏，安住聖主處，在大眾中師子吼，能轉梵輪；諸沙門、婆羅門，若天、若魔、若梵、若復餘眾，實不能轉，一無畏也。

「佛作誠言：『我一切漏盡。』若有沙門、婆羅門，若天、若魔、若梵、若復餘眾，如實難言：『是漏不盡。』乃至不見是微畏相。以是故，我得安隱，得無所畏，安住聖主處，在大眾中師子吼，能轉梵輪；諸沙門、婆羅門，若天、若魔、若梵、若復餘眾，實不能轉，二無畏也。

「佛作誠言：『我說障法。』若有沙門、婆羅門，若天、若魔、若梵、若復餘眾，如實難言：『受是法不障道。』乃至不見是微畏相。以是故，我得安隱，得無所畏，安住聖主處，在大眾中師子吼，能轉梵輪；諸沙門、

婆羅門，若天、若魔、若梵、若復餘眾，實不能轉，三無畏也。

「佛作誠言：『我所說聖道，能出世間，隨是行能盡苦。』若有沙門、婆羅門，若天、若魔、若梵、若復餘眾，如實難言：『行是道不能出世間，不能盡苦。』乃至不見是微畏相。以是故，我得安隱，得無所畏，安住聖主處，在大眾中師子吼，能轉梵輪；諸沙門、婆羅門，若天、若魔、若梵、若復餘眾，實不能轉，四無畏也。須菩提！是名菩薩摩訶薩摩訶衍，以不可得故。」

「復次，須菩提！菩薩摩訶薩摩訶衍，所謂四無礙智。何等四？義無礙、法無礙、辭無礙、樂說無礙。義無礙者，知諸法實相義。法無礙者，知諸法名。辭無礙者，言辭中無礙。樂說無礙者，審諦言無盡。須菩提！是名菩薩摩訶薩摩訶衍，以不可得故。」

「復次，須菩提！菩薩摩訶薩摩訶衍，所謂十八不共法。何等十八？一、諸佛身無失，二、口無失，三、念無失；四、無異想；五、無不定心；六、無不知已捨心；七、欲無減，八、精進無減，九、念無減，十、慧無減，十一、解脫無減，十二、解脫知見無減；十三、一切身業隨智慧行，十四、一切口業隨智慧行，十五、一切意業隨智慧行；十六、智慧知見過去世無礙無障，十七、智慧知

見未來世無礙無障，十八、智慧知見現在世無礙無障。須菩提！是名菩薩摩訶薩摩訶衍，以不可得故。

「復次，須菩提！菩薩摩訶薩摩訶衍，所謂字等、語等諸字入門。何等為字等、語等諸字入門？」

「阿字門，一切法初不生故。」

「羅字門，一切法離垢故。」

「波字門，一切法第一義故。」

「遮字門，一切法終不可得故，諸法不終不生故。」

「那字門，諸法離名，性相不得不失故。」

「邏字門，諸法度世間故，亦愛枝因緣滅故。」

「陀字門，諸法善心生故，亦施相故。」

「婆字門，諸法婆字離故。」

「荼字門，諸法荼字淨故。」

「沙字門，諸法六自在王性清淨故。」

「和字門，入諸法語言道斷故。」

「多字門，入諸法如相不動故。」

「夜字門，入諸法如實不生故。」

「吒字門，入諸法制伏不可得故。」

「迦字門，入諸法作者不可得故。」

「婆字門，入諸法時不可得故，諸法時來轉故。」

「磨字門，入諸法我所不可得故。」

「伽字門，入諸法去者不可得故。」

故。

「他字門，入諸法處不可得故。
「闍字門，入諸法生不可得故。
「簸字門，入諸法簸字不可得故。
「馱字門，入諸法性不可得故。
「賒字門，入諸法定不可得故。
「呿字門，入諸法虛空不可得故。
「叉字門，入諸法盡不可得故。
「哆字門，入諸法有不可得故。
「若字門，入諸法智不可得故。
「拖字門，入諸法拖字不可得故。
「婆字門，入諸法破壞不可得故。
「車字門，入諸法欲不可得故，如影五眾亦不可得

「魔字門，入諸法魔字不可得故。
「火字門，入諸法喚不可得故。
「蹉字門，入諸法蹉字不可得故。
「伽字門，入諸法厚不可得故。
「咤字門，入諸法處不可得故。
「拏字門，入諸法不來不去，不立不坐不臥故。
「頗字門，入諸法邊不可得故。
「歌字門，入諸法聚不可得故。
「醯字門，入諸法醯字不可得故。
「遮字門，入諸法行不可得故。

「陀字門，入諸法軀不可得故。

「茶字門，入諸法邊竟處不可得故，不終不生故。過茶無字可得。何以故？更無字故。

「諸字無礙無名，亦不滅，亦不可說，不可示，不可見，不可書。須菩提！當知一切諸法如虛空！須菩提！是名陀羅尼門，所謂阿字義。

「若菩薩摩訶薩，是諸字門印阿字印，若聞、若受、若誦、若讀、若持、若為他說，如是知當得二十功德。

何等二十？

得強識念，

得慚愧，

得堅固心，

得經旨趣，

得智慧，

得樂說無礙，

易得諸陀羅尼門，

得無疑悔心，

得聞善不憚、聞惡不怒，

得不高不下住心得無增減，

得善巧知眾生語，

得巧分別五眾、十二入、十八界、十二因緣、四緣、

四諦，

得巧分別眾生諸根利鈍，

得巧知他心，

得巧分別日月歲節，

得巧分別天耳通，

得巧分別宿命通，

得巧分別生死通，

得能巧說是處非處，

得巧知往來坐起等身威儀。

須菩提！是陀羅尼門、阿字門等，是名菩薩摩訶薩摩訶衍。」

【論】

釋曰：

「字等、語等」者，是陀羅尼，於諸字平等，無有愛憎。又此諸字，因緣未會時亦無，終歸亦無，現在亦無所有，但住吾我心中，憶想分別覺觀心說；是散亂心說，不見實事，如風動水則無所見。「等」者，與畢竟空、涅槃同等。菩薩以此陀羅尼於一切諸法通達無礙，是名「字等、語等」。

問曰：

若略說則五百陀羅尼門，若廣說則無量陀羅尼門，今

何以說是字等陀羅尼名為諸陀羅尼門？

答曰：

先說一大者，則知餘者皆說；此是諸陀羅尼初門，說初，餘亦說。

復次，諸陀羅尼法皆從分別字語生，四十二字是一切字根本。因字有語，因語有名，因名有義；菩薩若聞字，因字乃至能了其義。

是字，初阿、後荼，中有四十。得是字陀羅尼菩薩，若一切語中聞阿字，即時隨義，所謂一切法從初來不生相。阿提，秦言初；阿耨波陀，秦言不生。

若聞羅字，即隨義知一切法離垢相。羅闍，秦言垢。

若聞波字，即時知一切法入第一義中。波羅木陀，秦言第一義。

若聞遮字，即時知一切諸行皆非行。遮梨夜，秦言行。

若聞那字，即知一切法不得不失，不來不去。那，秦言不。

若聞邏字，即知一切法離輕重相。邏求，秦言輕。

若聞陀字，即知一切法善相。陀摩，秦言善。

若聞婆字，即知一切法無縛無解。婆陀，秦言縛。

若聞茶字，即知諸法不熱相。南天竺茶闍他，秦言不熱。

若聞沙字，即知人身六種相。沙，秦言六。

若聞和字，即知一切諸法離語言相。和（于波反）波他，秦言語言。

若聞多字，即知諸法在如中不動。多他，秦言如。

若聞夜字，即知諸法入實相中，不生不滅。夜他跋，秦言實。

若聞吒字，即知一切法無障礙相。吒婆，秦言障礙。

若聞迦字，即知諸法中無有作者。迦羅迦，秦言作者。

若聞婆字，即知一切法一切種不可得。薩婆，秦言一切。

若聞摩字，即知一切法離我所。魔迦羅，秦言我所。

若聞伽字，即知一切法底不可得。伽陀，秦言底。

若聞陀字，即知四句如去不可得。多陀阿伽陀，秦言如去。

若聞闍（社音）字，即知諸法生老不可得。闍提闍羅，秦言生老。

若聞濕波字，即知一切法不可得，如濕波字不可得。

濕簸字無義，故不釋。

若聞馱字，即知一切法中法性不可得。馱摩，秦言

法。

若聞賒字，即知諸法寂滅相。賒多（都餓反），秦言寂

滅。

若聞呿字，即知一切法虛空不可得。呿伽，秦言虛

空。

若聞叉字，即知一切法盡不可得。叉耶，秦言盡。

若聞哆字，即知諸法邊不可得。阿利迦哆度求那，秦言是事邊得何利。

若聞若字，即知一切法中無智相。若那，秦言智。

若聞他字，即知一切法義不可得。阿他，秦言義。

若聞婆字，即知一切法不可破相。婆伽，秦言破。

若聞車字，即知一切法無所去。伽車提，秦言去。

若聞濕𦼮字，即知諸法牢堅如金剛石。阿濕𦼮，秦言

石。

若聞火字，即知一切法無音聲相。火夜，秦言喚來。

若聞蹉字，即知一切法無慳無施相。末蹉羅，秦言

慳。

若聞伽字，即知諸法不厚不薄。伽那，秦言厚。

若聞他(土茶反)字，即知諸法無住處。南天竺他那，秦

言處。

若聞拏字，即知一切法及眾生不來不去，不坐不臥，

不立不起，眾生空、法空故。南天竺拏，秦言不。

若聞頗字，即知一切法因果空故。頗羅，秦言果。

若聞歌字，即知一切法五眾不可得。歌大，秦言眾。

若聞醯字，即知醯字空，諸法亦爾。

若聞遮字，即知一切法不動相。遮羅地，秦言動。

若聞吒字，即知一切法此彼岸不可得。吒羅，秦言岸。

若聞茶字，即知一切法必不可得。波茶，秦言必。

茶外更無字；若更有者，是四十二字枝派。

是字常在世間，相似相續故、入一切語故「無礙」。如國不同，無一定名，故言「無名」。聞已便盡，故言

「滅」。諸法入法性，皆不可得，而況字可說！諸法無憶想分別故「不可示」。先意業分別故有口業；口業因緣故，身業作字；字是色法，或眼見、或耳聞，眾生強作名字。無因緣，以是故「不可見」、「不可書」。諸法常空，如虛空相，何況字說已便滅！是文字陀羅尼，是諸陀羅尼門。

問曰：

知是陀羅尼門因緣者，應得無量無邊功德，何以但說二十？

答曰：

佛亦能說諸餘無量無邊功德，但以廢說般若波羅蜜故，但略說二十。

「得強識念」者，菩薩得是陀羅尼，常觀諸字相，修習憶念故，得強識念。

「得慚愧」者，集諸善法，厭諸惡法故，生大慚愧。

「心得堅固」者，集諸福德、智慧故，心得堅固如金剛；乃至阿鼻地獄事，尚不退阿耨多羅三藐三菩提，何況餘苦！

「得經旨趣」者，知佛五種方便說法故，名為得經旨趣：一者、知作種種門說法，二者、知為何事故說；三者、知以方便故說，四者、知示理趣故說，五者、知以大悲心故說。

「得智慧」者，菩薩因是陀羅尼，分別破散諸字，言語亦空，言語空故名亦空，名空故義亦空；得畢竟空，即是般若波羅蜜。

「智慧樂說」者，既得如是畢竟清淨無礙智慧，以本願、大悲心度眾生故樂說易。

「得陀羅尼」者，譬如破竹，初節既破，餘者皆易；菩薩亦如是，得是文字陀羅尼，諸陀羅尼自然而得。

「無疑悔心」者，入諸法實相中，雖未得一切智慧，於一切深法中無疑無悔。

「聞善不喜、聞惡不瞋」者，各各分別諸字，無讚歎、無毀訾故，聞善不喜，聞惡不瞋。

「不高不下」者，憎愛斷故。

「善巧知眾生語」者，得解一切眾生言語三昧故。

「巧分別五眾、十二入、十八界，十二因緣、四緣、四諦」者，五眾等義如先說。

「巧分別眾生諸根利鈍、知他心、天耳、宿命、巧說是處非處」者，如十力中說。

「巧知往來坐起等」者，如《阿鞞跋致品》中所說。

「日月歲節」者，日名從旦至旦，初分、中分、後分；夜亦三分。一日一夜有三十時：春、秋分時，十五時屬晝，十五時屬夜；餘時增減——五月至，晝十八時，夜十二時；十一月至，夜十八時，晝十二時。

一月，或三十日、或三十日半、或二十九日、或二十七、或二十七日半。

有四種月：一者、日月，二者、世間月，三者、月
月，四者、星宿月。

日月者，三十日半；世間月者，三十日；月月者，二
十九日加六十二分之三十；星宿月者，二十七日加六十七
分之二十一。

閏月者，從日月、世間月二事中出，是名十三月。

或十二月、或十三月，名一歲。是歲三百六十六日，
周而復始。菩薩知日中分時，前分已過，後分未生，中分
中無住處，無相可取，日分空無所有。到三十日時，二十
九日已滅，云何和合成月？月無故，云何和合而為歲？以
是故，佛言：「世間法如幻、如夢，但是誑心法。」菩薩能
知世間日、月、歲和合，能知破散無所有，是名「巧分
別」。

如是等種種分別，是名「菩薩摩訶薩摩訶衍」。

【經文資訊】大正藏第 25 冊 No. 1509 大智度論

般若心經略疏連珠記下

宋玉峯沙門師會述

經羯下二正說呪辭。二正下二疏語二。初理不可釋。是諸等者。以諸佛心印下位不測故不須釋。二若下二應機強釋。疏主應鄭公之請。而強釋也。然雖云祕密不可說。有因緣故亦可無言而言。如文殊五字呪。而般若等經大智度論皆有解釋。智論曰。阿字是實相門則顯三種般若。不相捨離字即名字般若。入般若波羅蜜門即觀照般若。悟不生等即實相般若。大品云。阿字門一切法初不生故。智論釋云。若菩薩一切諸法中聞阿字即時隨義。所謂一切法從初來不生相。以阿提秦言初故。阿耨波陀秦言不生故。大品云。囉字悟一切法離塵垢故。論云。若聞囉字即隨義知一切法離垢相。以囉闍秦言垢故。大品云。波者第一義故。論云。若聞波字即知一切法入第一義。以波羅末陀秦言第一義故。大品云遮字修不可得。論云。若聞遮字即時知。一切法。諸行皆悉非行。以遮利夜秦言行故。大品云。那字門諸法離名性相不得失故。論云。若聞那字即知一切法不得失不來不去。以那秦言不故。故知不因緣亦可強釋。三慶讚迴向般若深邃讚也。累劫難逢慶今逢也。隨分讚釋謙也。冀會真宗迴向實際也。而言真宗者。謂般若真宗亦佛法大宗也。

般若心經疏連珠記下(終)

心經疏者。廼唐賢首國師。於譯場中應鄭公之請。而作也。其文約其旨微。故述鈔之家尤為難能。慧因華嚴法師。獨明幽趣穎邁常譚。每苦舊章頗乖疏意。一日俯從眾請。爰出新記。名曰連珠。蓋取諸祖遺訓以為指南。經論格言而作程式。鉤索深隱詒厥方來。俾令慧炬相然。則其功豈不懋矣。時皇宋乾道龍集乙酉中秋既望。沙門慧詵題。

【經文資訊】大正藏第 33 冊 No. 1713 般若心經略疏連珠記

妙法蓮華經文句卷第一下

天台智者大師說

本迹者，是憍陳如本自不生，非始不生；欲引乳為酪故，迹為初教不生；引酪為生蘇故，迹為通不生；引生為熟故，迹為別不生；引熟為醍醐故，迹為圓不生。而其本地住阿字門，謂一切法初不生故。若聞阿字門，則解一切義皆非生非不生；垂迹引化，能為生不生。眾生若能會圓不生，則同阿若，非本非迹、非生非不生，大事因緣於茲畢矣。故下文云：「富樓那，種種變化事，我若具足說，眾生聞是者，心則懷疑惑。」即其義也。《阿含》云：「阿難持傘蓋燈隨佛後，大梵王持傘蓋燈隨陳如後。」斯皆示迹而欲顯本也。

【經文資訊】大正藏第 34 冊 No. 1718 妙法蓮華經文句

四教義卷第十二

天台山修禪寺智顓禪師撰

◎第三引眾經論證誠明圓教位者。大涅槃經明月愛三昧。從初一日至十五日。光明漸漸增長。又從十六日至三十日。光明漸漸減盡。月光漸漸增長。譬智德十五摩訶般若光明。漸漸減盡。譬十五斷德。無累解脫無明漸漸減盡也。十五種智斷者。三十心為三智斷。十地為十智斷。等覺為一智斷。合為十五智斷。故從初一日至十五日。故以月為譬也。月體即譬法身。法身是一光明漸增譬般若智德不生而生。光明漸減譬解脫斷德不滅而滅。故涅槃經明。從初實安置諸子祕密之藏三德涅槃。然後我亦當於此祕藏藏而般涅槃。此最後究竟涅槃。名為不生不生。般若畢竟不生不滅。更無惑可滅也。問曰若是圓位頓悟一證即便應究竟。何得引月愛三昧十五日月喻。答曰一向無淺深已如前破。但證位是諸佛境界。凡夫未識豈可定執。今借十五日月喻者。此約不可喻中而論喻耳。故涅槃經云。又解脫者。名無譬喻。無譬喻者即真解脫。譬如面譬如滿月。實非無有五根相同彼月也。問曰何得知月喻譬地位。答曰勝天王般若具出此義。問曰若約佛性中道明無明所覆。何得定有四十二品。答曰此義前已略明。無明雖無所有。不有而有。不無淺深階品。一往大分為四十二品。然論品數。實自無量無邊不可說示。故大智論云。無明品類其數甚

多。是故處處說破無明三昧。又云。法愛難盡。處處重說般若也。法華經云。諸佛為一大事因緣故。出現於世。為令眾生開佛知見。示佛知見。悟佛知見。入佛知見道故。此之四義。南嶽師解云。開佛知見即是十住。示佛知見即是十行。悟佛知見即是十迴向。入佛知見即是十地。及等覺地。皆言佛知見者。悉得一切種智也。皆言佛知見者。悉得佛眼也。又法句云。是為諸佛一大事因緣者。同入一乘諸佛實相也。又云。唯佛與佛乃能究盡諸法實相。又火宅品。諸子門外索車。長者各賜諸子等一大車。是時諸子。乘此寶車遊於四方嬉戲。快樂自在無礙直至道場。言四方者。即譬開示悟入之四位也。直至道場。即究竟盡諸法實相妙覺極位。如此皆是明圓位之異名也。小品經。明阿字等四十二字門。南嶽師解云。此是諸佛之密語。表四十二心之位。若學問人多疑此語。謂大智論無此釋。然龍樹釋小品經。論有千卷什師並略。何必無此釋也。今謂此解深應冥會。所以然者。經說初阿後茶。中有四十二字。初阿字門亦具四十二字。後茶字門亦具四十二字。華嚴經云。從初一地具足一切諸地功德。詳此義意。極似相關。又大品經云。若聞初阿字門。則解一切義。所謂一切法初不生故。此豈非圓教菩薩。初得無生法忍之位也。過茶無字可說。此豈非是妙覺極地無上無上無過。不可過此字有法而可說也。又大品經廣乘品。說一切法門竟。即說四十二字。豈非是圓教菩薩。從初發心得諸法實相。具一切佛

法。故名阿字。至妙覺地窮一切諸法源底。故名荼字。作此解釋圓教之位極似分明。又四十二字門。後即說十地。此即是顯別教方便之次位也。又次十地說三乘共十地。即是顯通教方便之位也。經文三處宛然。比決圓別通三教。顯在大品經文也。故大品經云。是乘從三界。出到薩婆若中住。又三慧品云。菩薩從初發心修習三慧。至坐道場。仁王般若經云。三賢十聖忍中行。唯佛一人能盡源。前所引思益楞伽等經。明寂滅真如有何次位。即是無次位之次位也。又瓔珞經云。三賢菩薩心心寂滅。自然流入薩婆若海。華嚴經明四十一位。既是圓頓之教。明圓位之意甚自分明。但有時開別教方便之說。事相隔別似如淺近。故十地論師。作教道證道二道明義。或作地相地實二種明義。正是為修行別教方便事相之文也。又云。一切無礙人一切道出生死也。智度論云。菩薩從初發心。觀涅槃行道。乃至坐道場。又云。菩薩從初發心。觀諸法實相慧。名為般若波羅蜜。至佛心中變名一切種智。譬如入海有始入者。有後入者有至半者。有到彼岸者。皆名入海。菩薩亦爾。從初發心觀諸法實相。實相雖一。而觀智不無淺深之殊也。

